

Parlamentario Danguí Oduber

Renobacion y ampliacion Proyecto di hospital ta keda uno cuestionabel

Di hopi tempo ta ser papia di e proyecto di renobacion y ampliacion construccion di un hospital nobo aki. Nos tur aki na Aruba ta consciente di e situacion di nos cuida medico y sa tambe cu e hospital actual no ta carga e demanda mas di nos pueblo. En berdad un expansion ta na su luga. Nos no ta contra un expansion pero loke nos ta cuestiona si ta e proceso cu a tuma luga pa otorgacion di e proyecto aki y muy en special e scoring cu a tuma luga. Tin 2 compania cu e bid pa e proyecto di hospital, cual ta Bouygues y Arellano. Esaki ta straña nos masha hopi mes pasobra si nos compara e calidad y experiencia di Bouygues cu esun di Arellano

hamas y nunca por a score Arellano mas halto. Bouygues ta un compania Frances cu mundialmente ta conoci y ta un di e companianan mas grandi di construccion mundialmente. Nan tin total 174,000 empleado y tin proyectonan den tur continente na mundo. Nan ta riba e French Stock Exchange. Nan turnover ta 33.000.000.000 Euro y nan a wordo funda na aña 1952. Nan tin proyectonan den 80 pais rond mundo. En cambio e compania Arellano nunca a haci ningun trabou pafo di Merca y nan tin solamente 500 empleado y nan turnover ta 375 miyon dollar. Nan a wordo estableci na aña 1973. Awor e pregunta ta, a base di e

informacion duna aki con por ta posibel cu ta score Arellano mas halto cu Bouygues ariba e punto aki di calidad y experiencia?? Ta bon pa refresca memoria di tur hende aki na Aruba ta kende ta architect cu tabata encarga cu e diseño di e proyecto di hospital aki. E architect cu tabata encarga cu e diseño ta nada mas y nada menos esun cu a diseñá e famoso "racetrack" den añanan 90, cu ta Bermello Ajamil. Te dia di awe ainda pais Aruba ta paga un claim pa e proyecto aki. Tin hopi informacion cu e pueblo aki no ta dispone di dje. Nos ta kere ta na su luga ora cu ta trata placa di pueblo mester duna e pueblo tambe e transparencia necesario. Ningun

día SOGA ni minister di salubridad publico ni gobierno a aplica pueblo cu e proyecto di hospital aki ta wordo otorga na Arellano cu a bid 42 miyon florin mas halto cu Bouygues, no ta inclui camber nan pa operacionnan (OK=operatie kamers). Con por ta posibel cu un architect ta diseñá un hospital anto e parti di mas importante di henter un hospital cu ta e sala di operacion, no ta inclui aden. Segun SOGA e bidding pa e sala di operacionnan lo wordo haci apart. Awor con SOGA ta otorga e proyecto y ta firma cu Arellano anto awor nan ta bay busca un otro contratista pa traha e sala di operacionnan. Logica ta bisa bo cu algo no ta cuadra aki y ta pone bo pensa cu cosnan straño a tuma luga. Otro punto cu ta resalta den e proyecto aki ta cu durante e scoring process e compania Frances Bouygues a wordo castiga y duna un cifra masha abou pasobra e la pone den su bid cu su contingency (meerwerk=trabou nan imprevisible cu por bin durante construccion) lo ta 0%. Es decir, e prijs cu e la duna e lo mantene te na final y si bin algun gasto adicional esaki nan mes lo para responsabel pa esaki. En cambio Arellano a pone den su bid cu nan contingency lo ta 5%. Cu otro palabra e prijs cu nan a duna ainda ta bai bin 5% riba e esaki. Si analisa esaki bon hamas y nunca SOGA por

tuma un decision di duna esun cu tin 5% meerwerk e proyecto aki, pero esaki ta netamente loke a sosode. Loke nos a compronde awor aki ta cu despues cu esaki a sali na claridad awor SOGA a bay negocia cu Arellano pa baha nan prijs y pone pa NO tin meerwerk den nan prijs. En bes di esaki Arellano lo bay cobra pa extra werk. E extra werk aki ta trabounan adicional despues di e periodo di construccion.

E score final tabata Arellano 6.92 y Bouygues 6.22, un diferencia di apenas 0.7 y den porcentahe 11%. E diferencia den placa sin embargo ta 42 miyon florin. E compania cu a perde e bid cu ta Bouygues a bid 42 miyon florin mas abou cu Arellano y asina mes e comision a scoge pa "gun" Arellano e bid aki.

Nos a compronde cu na palo di coco pa e proyecto aki so mester bay paga 4 miyon florin. Esaki nan ta parce e palo di coco nan cu a wordo uza tempo e proyecto di Radisson den pasado. Loke mas nos ta lamenta di e proyecto aki ta cu awor mester bay aumenta e prima di AZV y bin cu eigen bijdrage. E aumento di prima di AZC+V segun minister Schwengle lo ta pa cubri e gastonan di e hospital nobo aki. Pueblo tin cu bay sacrifica paga mas prima anto gobierno ta otorga e proyecto na esun cu a bid 42 miyon florin mas halto.